

KOLOSE **Pê Chyáng Hun Kat é Laiká** **(Colossians)**

¹ Garai Gasâng eq hkyin yù mù, Hkrisduq Yesuq é lagyo dut sù, ngò Poluq eq nga-nhùng é gumang Timohti gi, ² Kolose wà mó má nyi bang nghut é, Hkrisduq má chyoiyúng bang nghut é, lhumzuí é gumang wui chyáng dang kyô kat lhê. Nga-nhùng é Íwa Garai Gasâng chyáng mâ é jeju eq nuingón hkyô gi, nungmoq chyáng ru joq nyi sháng gaq.

Jeju Hkya-ôn É Eq Kyûdung É Dang

³ Ngamoq gi, nungmoq é matú kyûdung byí é hkûn, nga-nhùng é Yhumsing Yesuq Hkrisduq é Íwa nghut é Garai Gasang lé ayang jeju hkya-ôn lhê. ⁴ Hai mù gâ le, Hkrisduq Yesuq má nungmoq lumjینگ hkyô eq Yhâng é sân-yúng bang banshoq lé nungmoq chyitdap é hkyô lé, ngamoq wó gyô é yanmai nghut lhê. ⁵ Lumjینگ myit eq chyitdap myit haû gi, nungmoq é matú mauhkung htoq má hkong to byí é myit myoqbyù hkyô* mai lo é nghut lhê. Myit myoqbyù hkyô haû lé gi, nungmoq chyáng jé to bê gabú danglù nghut é tengmán mungdang mai, nungmoq wó gyô to gû nghut lhê. ⁶ Nungmoq gi, gabú danglù haû lé wó gyo luí, Garai Gasâng jeju eq sêng é tengmán hkyô lé sê hkyang é buinyi mai, nungmoq chyáng ashi zuí é eq kô myhang nyi bê nghut é eq rajung za, gabú

* **1:5** Bun zo shí má bo é myit myoqbyù hkyô gi, Yesuq lé tai é nghut lhê.

danglù haû gi, mingkan gón má ge é ashi zuî nyi é eq kô myhang nyi bê nghut ri. ⁷ Nungmoq gi, haû hkyô lé, ngamoq é chyitdap byinzùm Epahpra chyáng mai mhoq yu é nghut lhê. Yhang gi, ngamoq é gunglik dông, Hkrisduq é lhumzuî é hpúng mù wùn sù nghut lhê. ⁸ Yhang gi, haû Woi-nyí eq nungmoq lé byî tô é chyitdap hkyô lé, ngamoq lé taî kyo sù le nghut ri.

⁹ Haû nghut é yanmai, ngamoq gi, nungmoq eq sêng é hkyô lé wó gyô é nyí mai, nungmoq é matú ayang kyûdung byî nyi lhê. Garai Gasang ô nau é hkyô lé sé râ hpaqchyí lé, woi-nyí eq sêng é hpaqchyí byéng-yá eq sê gyô é nyan banshoq dông mai nungmoq chyáng lhoq pyíng byi sháng gaq nghû, Yhâng chyáng kyûdung byî nyi lhê. ¹⁰ Haû su kut kyûdung byí é gi, haû Yhumsîng ô nau é hkyô eq gingdán é dông nungmoq asak wó duí luí, hkyô hkangmó má Yhang lé wó gabú nhâng râ matú nghut lhê. Hau dông mai, nungmoq gi, ge é muzó hkangmó má ashi zuî nyi luí, Garai Gasang lé sê é hpaqchyí má kô myhang nyi kó râ nghut lhê. ¹¹ Hau htoq agó, nungmoq gi, Yhâng é hpungwup a-tsam dông mai a-tsam banshoq eq wum-o lhoq kíng byí é huí nyi kó râ nghut lhê. Haû mù, nungmoq gi, gyai hkam jân é hkyô eq myit hing é hkyô lé, gabú myit mai wó yû kó râ nghut lhê. ¹² Maubó é mingdán má, sân-yúng bang eq sêng é muizè lé wó bo hkam yù râ matú, nungmoq lé gingdán nhang é sù haû Íwa lé le, jeju wó hkya-on kó râ nghut lhê. ¹³ Hkâsu mù gâ le, Íwa haû gi, nga-nhúng lé, mauchut eq up é hkaû mai hkyi htoq yû luí, Yhang chyitdap é Yhang Zô é mingdán

má shuí hâng é Sû nghut lhê. ¹⁴ Nga-nhúng gi, haû Yhang Zo đông mai, hkyi xe yu é hui mù, yubak mara hkyut pyám byî é hui bê nghut lhê.

Jung Hkangmó É Ushuq, Hkrisduq

¹⁵ Hkrisduq gi, myoq èq a byu-myàng é Garai Gasâng é gunghkyâng isâm nghut luî, zomún đông hpan tô é lhunghâng htoq má gyaú é sủ nghut ri. ¹⁶ Hkâsu mù gâ le, mauhkúng eq myigùng htoq má joq é azíng zê pé, myoq èq byu-myang é eq a byu-myang é pé nghut kôle, hkohkâm ayá pé, a-tsam pé, uphkâng bang, ahkáng ayá wó bang nghut kôle, lhungháng gi, Yhâng èq hpan to huî é chyat nghut lhê. Lhungháng gi, Yhâng é matú, Yhâng èq hpan to huî é chyat nghut ri. ¹⁷ Yhang gi, lhunghâng é hí má é nghut mù, lhungháng gi, Yhâng é yanmai joq gíng bum é chyat nghut lhê. ¹⁸ Yhang gi, noqkuq hpúng nghu é gungdû é ulhum nghut ri; Yhang gi, jung hkangmó má gyaú dik é ushuq dut sháng gaq ga, sâng-hi awang nghut sủ eq shi é bang má é hí dui toq é zomún dut sủ nghut ri. ¹⁹ Hkâsu mù gâ le, Garai Gasang gi, Yhâng é byíng jup hkyô banshoq, Yhang Zo má joq nyi rả lé myit nguì ô nau é nghut mù, ²⁰ haû tapzíng má htoq byî é Yhang Zô é sui đông mai nguingón hkyô kut byî é èq, myigùng htoq má é azíng zê nghut nghut, mauhkúng má é azíng zê nghut nghut, lhungháng lé, Yhang Zo đông mai, Yhang eq nguingón simsaq hkyô xoq yủ bê nghut ri.

²¹ Nungmoq gi, Garai Gasang eq wê gâng é bang dut wủ kôluî, nungmoq é agè ashop nyi yap sâmlai é yanmai, nungmoq i-myit má, Yhâng é gye dut wủ bekô nghut lhê. ²² Nghut kôlhang, ahkuî, Garai

Gasang gi, nungmoq lé, râ é hkyô a bo é eq mara hûn râ hkyô a bo é za, chyoiyúng é dông Yhâng é hí má shit râ matú, Hkrisduq é gungsho gungdu shí hkâm é dông, nungmoq eq nguingón simsaq hkyô xoq yû bê nghut ri. ²³ Haû gi, gabú danglù mai wó yu tô é myoqbyù hkyô mai a htot byuq é za, kô myhang nyi é eq gingtîng nyi mù, nungmoq é lumjîng hkyô má xoq nyi nyi é nghut jáng sheq dut râ nghut lhê. Gabú danglù shí gi, nungmoq wó gyô wú bê nghut é htoq agó, mauhkûng ô má hpan tô é jung hkanmó lé hko kyô nyi bê nghut lhê. Ngò, Poluq le, gabú danglù hau é dui-nhâng zoshâng dut é nghut lhê.

Noqkuq Hpúng É Matú Poluq Wùn Waq É Hkyô

²⁴ Ahkuî, ngò gi, nungmoq é matú jamjau huí é má gabú lhê; hau htoq agó, Hkrisduq é gungdu nghut é, noqkuq hpûng é matú, râ tô ashî nghut é, Yhang hpuzô é hkyô lé, ngá é gùng má ngò lhoq gumjup yu nyi lhê. ²⁵ Ngò gi, Garai Gasâng é mungdang lé, nungmoq chyáng gumjup shoq hko kyo râ matú, Garai Gasang, ngo lé hun tô é wò mai, noqkuq hpúng hau é mô wùn sù dut é nghut lhê. ²⁶ Mungdang haû gi, gohkûn mai apyat pyat haq tô gyó lo é zaú tô é hkyô nghut kôlhang, ahkuî gi, haû sân-yúng bang lé hpông shit bê nghut ri. ²⁷ Garai Gasang, haû su kut é gi, zaú tô é hkyô hau é agùn agó hpungwup shîngkang, tûngbaù pê chyáng hkâsu nghut é hkyô, yhangmoq lé sé nhâng râ matú nghut lhê. Zaú tô é hkyô haû gi, hpungwup shîngkang lé myoqbyù é hkyô nghut é, nungmoq má Hkrisduq dui nyi bê hkyô lé gâ é nghut lhê.

28 Hkrisduq má gumjup é dông, byù yuq hkanmó lé wó shuí jé sháng gaq nghû, ngamoq gi, Hkrisduq é hkyô lé taí pyô luí, yuq hkanmó lé, hpaqchyí byéng-yá banshoq èq taí pun taí kyíng é eq mhoqshit nyi é nghut lhê. 29 Ngò, haû-í yhang wó wùn waq shikut é gi, ngò má wum-o a-tsam byíng byíng mù zuí nyi Su é wum-o banshoq èq wùn waq shikut nyi é ru nghut lhê.

2

1 Ngò gi, nungmoq é matú le, Ladoki wà mó bâng é matú le, ngò eq myoqdong hkyûm a huí wú shí é bang banshoq é matú le, hkâ-í yhang awui ahke shikut nyi é hkyô lé, nungmoq lé sé nhâng nau ri. 2 Haû su awui ahke shikut é hkyô gi, yhangmoq, myit má wum-o byí é hui râ eq chyitdap myit má rading ralhum za wó dut râ matú nghut lhê. Haú hkûn, yhangmoq gi, Garai Gasâng é zaú tô é hkyô nghut é, Hkrisduq lé wó sé râ matú, sê gyô é nyan lhunghâng é isut byíng shoq lé wó yû kó râ nghut lhê. 3 Haû Hkrisduq má kúm gi, hpaqchyí byéng-yá eq sumsé hpaqchyí gâ é sutzè lhungháng lé tsíng tô ri. 4 Nungmoq lé ngò haú hkyô taí kyô é gi, ó yuq le, dang ngón dang ngui èq mhoq hpyoq é dông, nungmoq lé a wó mhaú zo râ matú nghut lhê. 5 Hkâsu mù gâ le, ngá gungdu nungmoq eq rahá a nyi kôhang, ngá é myit gi, nungmoq eq rahá nghut nyi luí, nungmoq shuq shuq tap tap za nghut nyi kô é eq Hkrisduq lé lumjíng é má hkâ-í gíngtíng nyi kô é lé myàng mù, ngò gabú nyi lhê.

Hkrisduq Dông Mai Wó É Gumjup É Asak Dui Hkyô

⁶ Haû mù luî, nungmoq gi, Hkrisduq Yesuq lé Yhumsîng nghû hap yù bekô nghut é eq rajung za, Yhang má asak xoq dui nyì keq. ⁷ Yhang má apûn amyit chîn gîng nyì mù, kô myhang lò luî, nungmoq mhoq yù bê eq rajung za, lumjîng hkyô má wum-o lhoq kíng mù, jeju hkya-ôn é hkyô byíng zan nyì keq.

⁸ Hkrisduq chyáng mâ é a nghut é za, mingkan shî mâ é uphkâng tarâ pé eq xângzo wui é htûngli cháng luî, mhaú zô é myit són hpaqchyî eq akyû a bo é dang dông, ó yuq èq le, nungmoq lé a wó shuí nghoq yù kó sháng gaq, sidiq nyì keq.

⁹ Hkâsu mù gâ le, Garai Gasâng é gumjup hkyô banshoq gi, Hkrisduq é gungdu hkyangmân má lúng nyì mù, ¹⁰ nungmoq gi, a-tsam bo é banshoq eq ahkáng ayá wó é banshoq é ushuq nghut é Hkrisduq eq sêng é bang nghut kômù, gumjup é bang dut bekô nghut ri. ¹¹ Yhang má, nungmoq gi, byu loq èq kut é ahpyo-kuq hpyit hkyô dông a nghut é za, ahpyo-kuq hpyit é su, Hkrisduq èq yubak gungsho mara lé hkyut sêng pyâm é hkyô lé hkam yù bekô nghut ri. ¹² Nungmoq gi, wui-myhup hkâm é hkûn Hkrisduq eq rahá myhup yhûm é hui bekô nghut mù, Yhang lé shi é mai lhoq dui toq yu é, Garai Gasâng é a-tsam lé nungmoq lumjîng kô é yanmai, Yhang eq rahá lhoq dui toq yu é hui bekô nghut ri.

¹³ Nungmoq é yubak mara pé é yanmai le, nungmoq é yubak gungsho mara lé huî sêng pyâm é a hkam yu é yanmai le, nungmoq shi tô é hkûn, Garai Gasang gi, nungmoq lé, Hkrisduq eq rahá asak duì nhâng bê nghut ri. Yhang gi, nga-nhûng

é yubak mara lhunglhang lé hkyut pyám byi luí,
 14 nga-nhung eq shai lhum mù, nga-nhung lé htuq
 htíng é, tará pé bo é jéyáng rá jihpán lé huí sêng
 pyám byi bê nghut ri. Yhang gi, haú lé tapzîng htoq
 má dok tap pyâm é dông yu pyám byi bê nghut lhê.*

15 Haú dông mai, a-tsam bò bang eq ahkáng ayá wó
 bâng a-tsam lé lang hkyut hkyô pyám mù, Yhang gi,
 tapzing eq yhangmoq lé ung pyâm é dông, byù pé é
 hí má yhangmoq lé de de kut to bê nghut ri.

16 Haú mù luí, nàng haí zo haí shuq é yanmai
 le, noqkuq htúng eq sêng é poí buinyì, Lhoxan
 Lhosik poí, Bánno buinyì eq sêng luí le, nungmoq
 lé, ó yuq eq le a wó jéyáng kó sháng gaq. 17 Haú
 pé gi, dut lò rá hkyô pé é wupzo chyat nghut lhê;
 haú gùng gyíng gi, Hkrisduq yhang nghut nyi ri.

18 Myit lhoq nyhum mhaú é eq maumang lagyô pé
 lé noqkuq é lé myit nguì é sù ó yuq eq le, nungmoq
 lé, chyunghuq eq a gingdán rá dông hkâkut nhâng
 kó. Haú su é yuq gi, yhumsîng byu-myang é lé†
 za taí shikut mù, yhumsing é gungsho myit mai,
 akôm yhang nghut é lé gyáng dang taí é sù nghut
 ri. 19 Yhang gi, Garai Gasang kô myhâng nhang é
 su, gungdu gón é gungsho showui showang pé eq
 shogyi pé lé htuqbang byi mù rahá llang tsing tô
 é haú ulhum nghut é Hkrisduq eq xoq é hkyô lé
 byoq ló nhâng bê nghut ri.

20-21 Nungmoq gi, Hkrisduq eq rahá, mingkan

* **2:14** Yhang gi, haú lé tapzîng htoq má dok tap pyâm é dông yu
 pyám byi bê nghut lhê gâ é gi, Hkrisduq tapzîng má shí hkâm byí é
 hkûn, nga-nhung é yubak mara banshoq lé, Garai Gasâng eq hkyut
 pyám byí é lé taí nau é nghut lhê. † **2:18** Byu-myang é lé gâ é gi,
 yhang myit htoq é shing-rán lé gâ lhê.

shî mâ é tarâ pé eq shi gang bekô nghut le nhîng, haî mù, haû eq sêng lhum nyi ashî kó l hú? "Hkâzui, hkâchyâm, hkâzáng." gâ é tarâ ô má nyi nyi ashî kó l hú? ²² Haû pé gi, waxâng zô wui é hkunmó pé eq mhoqshit hkyô pé nghut é yanmai, jai chung é hkûn, htên byuq râ chyat nghut lhê. ²³ Haû sù é tarâ pé gi, yhumsîng yhang noqkuq shikut é, myit lhoq nyhum mhaû é eq gungdu lé gunjâng é pé nghut luî, hpaqchyî byéng-yá bo é su dut kôlhang, gungshô é agè ashop yut yut ô nau hkyô lé wó hkûm zing pyám râ má, hai akyû a bò nghut ri.

3

Chyoiyúng É Đông Asak Dui Râ Hkyô

¹ Haû mù luî, nungmoq gi, Hkrisduq eq rahá lhoq dui toq é hui bekô nghut jáng, Garai Gasâng é loqyo hkyam* má zung tô é Hkrisduq é jowò má joq é, ahtoq mâ é azíng zê pé lé myit ô nau nyi keq.

² Nungmoq gi, myidàm htoq mâ é azíng zê lé myit tuî é a nghut é za, ahtoq mâ é azíng zê lé myit tuî nyi keq. ³ Hkâsu mù gâ le, nungmoq gi, shî bekô nghut luî, ahkuî, nungmoq é asak gi, Hkrisduq eq rahá, Garai Gasang má haq tô é hui bekô nghut ri.

⁴ Nungmoq é asak nghut sù, Hkrisduq htoq shit é hkûn, nungmoq le, Yhang eq rahá, hpungwup shingkang hkaû má htoq shit kó râ nghut lhê.

⁵ Haû mù luî, nungmoq é mingkan hkyô eq sêng é, ashop é đông gungsho zùm yap é hkyô, agot a-û nyi zô lhúm é hkyô, ye lhaí nau é hkyô, agè ashop yut yut ô nau é hkyô eq, hparà noq hkyô

* **3:1** Loqyo hkyam nghû é gi, ahko ahkáng wó é jowò lé gâ é nghut lhê.

nghut é myoqnoq hkyô pé haí lé le sat pyám keq. ⁶ Haú hkyô pé é yanmai, Garai Gasâng é nhikmo-yo hkyô gi, jìno a gyo bâng é ahtoq má† jé râ za nghut lhê. ⁷ Laí lò bê hkûn, nungmoq le, haú hkyô pé dông sô wú kô é nghut lhê. ⁸ Nghut kôlhang, ahkuí, nungmoq gi, nhikjum yô é, nhikmo-yô é, agè ashop é dông nò shoq kut é, lumù gansang é eq, nungmoq é nhutwuí mai hkunchoq taí é hkyô shí pé banshoq lé, yhumsing gùng yhumsîng tô pyám râ dut lhê. ⁹ Rayuq eq rayuq hkâ-mhaú lhum kó; hkâsu mù gâ le, nungmoq gi, nungmoq é byù xau eq byù xaú é nyi yap hkyô lé hkyut pyám mù, ¹⁰ byù sik lé tû wut yú kô é nghut lhê; byù sik haú gi, sumsé hpaqchyí dông mai, yhang lé hpân Su é gungdu isâm má asik jat lò nhang é huí nyi ri. ¹¹ Byù sik má gi, Grik eq Yudaq byù nghu é, ahpyo-kuq hpyit hkâm bang eq a hkâm bang nghu é, byù bíng eq byù jum nghu é, jùn eq jùn a nghut sù nghu é a nyi lô é za, Hkrisduq gi, banshoq nghut mù, banshoq má nyi nyi ri.

¹² Haú mù luí, Garai Gasâng èq hkyin yù huí é bang, Yhâng èq gyai yhang chyitdap é huí é chyoiyúng bang dông, shogyo myit, gè hkyô shit é myit, lhoq nyhum é myit, nú nhâm é myit eq myit hing é hkyô pé lé, yhumsing gùng yhumsîng mebu su wut to keq. ¹³ Nungmoq yhangchang mara kut shut é hkyô joq é nghut jáng, hkam jan byí lhum luí, rayuq eq rayuq mara hkyut byí lhum keq. Haú Yhumsîng gi, nungmoq é mara hkyut pyám byí é su, nungmoq le mara hkyut byi keq. ¹⁴ Haú ge é

† **3:6** jìno a gyo bâng é ahtoq má, gâ é dang, chyúmding ra-am má a bò nghut lhê.

sâmlai banshoq wó é htoq agó, gumjup é rading ralhú za dut é hkyô má, banshoq lé rahá wó tuí zing tô é chyitdap myit lé puq wut to keq.

¹⁵ Nungmoq gi, ngingón hkyô wó râ matú ji yu é hui bekô nghut mù, gungdu ralhú má é bang chyat nghut bekô yanmai, Hkrisduq é ngingón hkyô lé, nungmoq é myit má up nhang nyi keq. Haû mù, jeju hkya-ôn nyi keq. ¹⁶ Nungmoq, rayuq eq rayuq, hpaqchyí byéng-yá banshoq èq mhoqshit é eq lhoq pun lhoq kyíng lhúm é hkún le, Garai Gasang lé nungmoq jeju bún é myit mai, jihkyang dang, hkya-on mahkôn, woi-nyí eq sêng é mahkôn pé hkon é hkún le, haû Hkrisduq é mungdang lé, nungmoq é myit nhikhúm má agùn agó bò nhang nyi keq. ¹⁷ Nungmoq haî wá kut kut, dang dông nghut nghut, zui saî é dông nghut nghut, banshoq lé Yhumsíng Yesuq é myíng mai kut é hkún, haû Íwa nghut é Garai Gasang lé Yhang dông mai jeju hkya-on keq.

Hkristan Ikun Byu Pé Nyi Yap Râ Hkyô

¹⁸ Ikun myhî pé ê, ikun hpô pé uphkan é ahkaû má nyi keq. Haû gi, Yhumsíng é hí má kut gíng é hkyô nghut lhê.

¹⁹ Ikun hpô pé ê, ikun myhî pé lé chyitdap nyi keq. Yhangmoq lé dang htân hkâ-nyô kó.

²⁰ Zo wuí ê, jung hkanmó má nungmoq é mó wui é jino gyo keq; hkâsu mù gâ le, haû gi, Yhumsíng ô nau é hkyô nghut lhê.

²¹ Íwâ pé ê, nungmoq é zo wuí lé myit hkâ-nô nhâng kó, nò nhâng jáng gi, yhangmoq, myit wum gyuí byuq kó râ nghut lhê.

²² Jùn pé ê, hkyô hkanmó má nungmoq é myidàm htoq mâ é jùn sîng bang uphkan é ahkaû má nyi nyi keq; yhangmoq é myoq hí má za zui saí luí, myoqdong ho é dông a nghut é za, haû Yhumsîng lé gyuq hkunggâ é eq lhumzui é myit mai zui saí nyi keq. ²³ Nungmoq haí wá kut kôle, byu é matú kut é a nghut, haû Yhumsîng é matú kut nyi é dông, nungmoq é myit nhiklhum banshoq eq zui saí nyi keq. ²⁴ Haí mù gâ le, nungmoq gi, haû Yhumsîng chyáng mai, muizè lé chyunghuq dông wó yû kó râ nghut é lé, sé kô é yanmai nghut lhê. Nungmoq dojaú nyi é sù gi, Yhumsîng Hkrisduq ru nghut lhê. ²⁵ Kut shut sù gi, yhang kut shut é marâ matú dam byi é hui zo râ nghut lhê, haí mù gâ le, Garai Gasang gi, myoqdong hkyin é hkyô a joq.

4

¹ Jùn sîng bang ê, nungmoq é jùn pé lé, tengmán é eq gíng âng é dông lajang byi nyi keq; haí mù gâ le, nungmoq le, mauhkûng htoq má Yhumsîng rayuq wó é lé sé kô é yanmai nghut lhê.

Xoq Lui Pying Kat É Hkyô

² Nungmoq gi, kyûdûng é má myit zìng zuq nyi mù, machyâ luí, jeju hkya-ôn nyi keq. ³ Ngò, shamtoq-tui hut huí nyi shoq dut é, Hkrisduq é zaú tô é hkyô lé ngamoq wó taí pyô sháng gaq, Garai Gasang gi, mungdang lé ngamoq taí râ hkyô hkum hpóng byi râ matú kyû bo dung byi kó laq. ⁴ Haû Hkrisduq é zaú tô é hkyô lé, ngò taí âng é dông san za wó taí pyô sháng gaq, kyû bo dung byi kó laq. ⁵ Nungmoq gi, a lumjìng bang eq zùm yap é hkûn

hpaqchyî bo nyî keq; wó yu é ahkyíng hkanmó lé rago yhang chung jai keq. ⁶ Nungmoq gi, yuq hkanmó lé hkâsu tú taí râ hkyô wó sé kó shoq, dang nyo é má, xô eq nghám nhang é su, hkâ-nhám le jeju byíng é dang bo nyî sháng gaq.

Ló Htâng É Shi-kyâm Dang

⁷ Tuhkiku gi, ngá hkyô eq sêng é danglù ban-shoq, nungmoq lé taí kyo râ nghut lhê. Yhang gi, ngá é chyitdap gumang, haù Yhumsîng má, lhumzui é hpúng mù wùn sù eq byinzùm nghut lhê. ⁸ Ngò, yhang lé nungmoq chyáng nhang kat é hkyô gi, ngamoq chyáng dut nyi é hkyô lé nungmoq wó sé râ eq, nungmoq lé myit wum wó byi râ matú nghut lhê. ⁹ Yhang gi, nungmoq chyáng mâ é nghut é, ngamoq é lhumzui chyitdap é gumang Onesimu eq rahá lé lo é nghut lhê. Yhangnhik gi, shî má dut nyi é hkyô jung hkanmó lé taí kyo kó râ nghut lhê.

¹⁰ Ngò eq rahá htóng lúng sù Aristakuq gi, nungmoq lé shi-kyâm kat ri. Barnaba é yhâng za-aù Markuq le, nungmoq lé shi-kyâm kat ri. (Markuq eq séng luí pying kat é hkyô lé nungmoq wó yù to bê nghut mù, nungmoq chyáng, yhang jé lé é nghut jáng, lhom hkûlum yù keq.) ¹¹ Yustu le gá é Yesuq le, nungmoq lé shi-kyâm kat ri. Garai Gasâng é mingdán matú ngá é byinzùm mù zui bang má, haù bang za Yudaq byu pé nghut kômù, yhangmoq gi, ngo lé nhik tíng byî é bang nghut akô. ¹² Nungmoq chyáng mâ é byù nghut sù eq Hkrisduq Yesuq é mù wùn sù, Epahpra gi, nungmoq lé shi-kyâm kat ri. Nungmoq gi, Garai Gasang ô nau é hkyô lhunglhang má hkyak lùm to mù, gumjup luí wó gingtíng nyî sháng gaq ga, Yhang gi,

ayang nungmoq é matú kyûdung shikut byî nyi ri.
¹³ Nungmoq é matú le, Ladoki wà mó eq Herapoli wà mó bâng é matú le, yhang gi, gyai yhang mù zui shikut byî é hkyô lé, yhang é matú ngò saksé hkâm lhê. ¹⁴ Ngamoq é chyitdap chi sará Lukaq eq Demaq gi, nungmoq lé shi-kyâm kat akô nghut ri.
¹⁵ Ladoki wà mó mâ é gumang wuì lé le, Numhpa eq yhâng yhùm mâ é noqkuq hpúng lé le, bo shi-kyám byi keq.

¹⁶ Laiká shî lé, nungmoq lé nghap kyô é htâng má, Ladoki byu pê é noqkuq hpúng má le nghap nhâng mù, Ladoki wà bâng chyáng hùn kat é laiká lé le, nungmoq nghap wú keq.

¹⁷ "Haû Yhumsing chyáng mai nàng hap yù to bê é muzó lé rago za lhoq pán pyám aq." nghû, Arhkipo lé taî kyo keq.

¹⁸ Ngò, Poluq gi, ngá é loq èq yhang shi-kyám dang shî lé kê kat é nghut lhê. Ngò, shamtoq-tui wut tô é lé bûn nyi keq. Jeju gi, nungmoq chyáng ru joq nyî sháng gaq ô.

Chyoiyúng chyumlaiká: dangshikaq asik; Zaiwa

New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

23f9fc55-a8a4-59ef-9513-707ec336b0ee